


T 2720/2963

CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
NOV 4 1968





宣大邊防

遠鎮惟大同最為重要其地偏倚大隅川谷因之

自置雲中郡水經注曰趙攻於河內定人城不詳

其詳鴻遊於雲中經日有光氣在子及附於此

故在漢武二年嘗遇春兵全克之其十餘萬

宜府實用素之上谷而鎮特前是險山而虛不

南無城守自有石塔自陽隆大開山北平



皇明大事記卷之三十五

朱國禎輯

塔佛大學漢和  
圖書館珍藏印

宣大邊防

邊鎮惟大同最當虜衝其地周爲大同川秦因燕趙之  
舊置雲中郡水經注曰趙侯於河西造大城不就禱焉  
見群鵠遊於雲中經日有光氣在下乃卽於此處築城  
故名洪武二年常遇春兵至克之置十衛稱重鎮旁引  
宣府宣府秦之上谷兩鎮犄角翼蔽山西虜不得入宣  
府鎮城外尚有葛峪白陽諸險大同直北平漫無山川  
可據虜登北嶺而望自大邊至三邊二百里舉在目前



瞭望者無所容按伏者不能掩至爲難守自成化中巡撫李敏修築邊牆壕塹墩臺九萬三千七百七十七丈余子俊又照延綏守牆法度地定基東自四海冶起西至黃河止長一千三百二十里二百三十三步舊有墩一百七十座內增築四百四十座凡十月告成弘治中許進納虜貢加修宿兵獨多本色外解縛然有餘鹽商四集漸號殷盛其險則五堡外障虜至格戰內兵一出便卽奔去自武宗巡幸至再供給搜括殆盡五堡之變賊卒往投越十年再亂益復凋敝虜衆蹂躪甚易軍餉轉輸極難鹽利衰息田無菑畬官民困竭莫甚於此各處牆垣攤塌小小修輯不足爲固舊設宣大總督旋設旋罷

嘉靖十八年 上南幸起毛伯溫總軍務行邊與大同撫臣史道疏請復築五堡許之其時總兵梁震雄勇善戰多家丁大同人深仗之堡成而震卒家丁多走虜爲用邊患益棘

十九年虜分道入塞大同人顧與約無掠我人畜我亦不復攔阻虜喜竟越大同由宣府犯山西三關京師大震遂修三關險隘添戍兵厚爲備

二十年議築大同邊垣總督樊繼祖謂虜必蹂躪我望



塵棄而却走徒費工力無濟保障巡撫龍大有以爲外邊遠不可築內邊又難爲力俱乞停止部覆大同地方祖宗朝設外邊復設次邊所以界限華夷雖尺寸皆金湯之地也今圯壞年久恐醜虜竊據永無恢復之日矣昔河套棄而陝右多事西海棄而甘州多事大寧棄而薊州多事三岔河棄而遼東多事懲前慮後乃知兩邊修築亦一時權宜之計但地方廣濶公私匱竭果難爲力

二十一年衆議牆工當舉于無事之日鳩工并力庶幾堅完卽風沙摧擁可以補苴今方多事虜騎長驅牆之築者尚俛半築者可超而越頃刻間卽成平陸事勢顯然上以去歲虜深入得利今秋必來宜以整兵防禦爲急修築暫止兵部尚書張瓚奏山西薊州遼東奇遊兵十枝候征宜大總督移任朔州便調遣各墩堡在近邊者刻期趣完或謂撤宜大以守三關是舍門戶禦堂與非計瓚不得已覆留增調遼兵總督翟鵬姑謾言自解謂虜騎充斥必不可禦且令各營急趣關南依牆固守俟賊情歸決戰毛伯溫爲兵部尚書請下大同迤北自鎮邊堡東暗門抵陽和後口搶風崖又自鎮河堡西界抵老營堡接境鑿壕削崖築牆修堡以原發賞功銀



備經費顧久弛難卒辦言者闕起謂虜惟恃馬力請刈去諸路秋禾使虜騎絕食則勢自困其可笑如此而三鎮防邊本意初未能有及者蓋先年山西防秋止守外邊偏老一帶歲發班軍四千五百人備禦大同而內邊寧鴈等處仍有官兵防守隘口爲大同聲援及與宣大各路分守舊兵皆屯駐城堡但遇警報相機防勦原無分地擺守比因大虜透入當時地方諸臣誤以大同爲不足恃乃獨築寧鴈以東至平刑邊牆八百里列兵守之後因兵力不敷添設太原等處叅遊兵馬七營招募及調新舊民壯屯夫弓兵大率六萬餘人公私搬運內

地騷動宣府亦自虜犯西路盡調本鎮兵馬專備西中而北路遂虛連年三鎮防秋徵調遠陝兵馬不下五六枝費用糧賞及本鎮守兵芻餉以百四十萬計勢益汗漫毛伯溫憂之謂各邊正奇遊叅兵馬原有定額邇者徵調則伍籍稱虛給餉則額名俱在其爲耗蠹莫此爲甚行總督諸臣覈軍實新舊登減之數并畫區收補之法至千里徵兵供億不貲一經調發則彼實此虛兼之警報東西不時未免疲於奔命惟飭邊臣預探遠瞭知虜所向專力爲備有警卽鄰境策兵往援上亦傳示兵部曰宣大二鎮屯戍重兵正爲山西畿甸藩籬往者



虜賊入邊殘民為害山西驚動畿輔守臣踵為故常失  
 事已甚矣今能極力戰守俾虜一大挫去則先賞宣大  
 諸臣之功其或彼此觀望致賊獨衝者治罪無赦仍發  
 太倉銀三十三萬兩備宣大芻粟

二十二年虜駐河套犯延綏宣大幸無事撤回督餉侍  
 趙廷瑞

二十三年增設大同各守備官詹榮自甘肅改鎮大同  
 議邊牆修築其費誠多其險原不足恃然舍此又無可  
 用力 國初兵彊長驅二千里力尚有餘今兵散且  
 弱縮于跬步猶不足明于步之義而後可以言守古曰

進寸退尺無牆一退不可復止虜騎直叩鎮城是無邊  
 也以城為邊不可久之計也今兩年中虜悉兵渡河而  
 西未即東行我得稍稍休息此天假之便及早程工實  
 為至計方議上而總督翟鵬得罪不果行其冬侍郎翁  
 萬達總督

二十四年兵部尚書戴金謂伯溫之說不可廢督撫可  
 仗疏言紫荆密雲係國門之藩屏宣大偏關又為紫荆  
 密雲之捍衛故添設重關以制夷虜若假以人力修補  
 必成不可犯之險乞勅一重臣相度亟為修築并勅萬  
 達議處以聞乃命兵部侍郎路迎兼僉都往尋停行掌



圍營直達銳意肩邊事謂大同爲山西外護守大同則山西自然無虞遂主併守之議蓋外邊控虜四時皆防城堡之兵各有分地冬春徂夏不必參錯徵發自無不足秋高馬肥虜必狂逞若拘泥往事散處城堡臨時攝調近者數十里遠者百餘里倉卒遽難合營首尾自不相應往年潰牆而入越關而南內地之人素不習戰卽欲堅壁清野已先被荼毒及至京師震騷方始皇皇請討勢已無及設險守國築垣乘障必資人力虜凡寇邊地迂峻則易防地平湯則難禦有牆則難者亦易無牆則易者亦難故百人之堡非千人不能攻以有垣塹足

憑也若遇虜于空曠之墟則失一狼走千羊徒飽虜腹是知山川之險險與虜共垣塹之險險爲我專我恃其所專而奪其所共修邊之役自不容已乃先度地自山西起保德州黃河岸透邈而東歷偏關抵老營堡盡境凡二百五十四里大同起西路丫角山透邈而北東歷中北二路抵東路之東陽河鎮口臺凡六百四十七里宣府起西路西陽河透邈而東北歷中北二路抵東路之永寧四海冶凡一千二十三里共一千九百餘里皆逼臨胡虜險在外者也所謂極邊也山西老營堡轉南而東歷寧武鴈門北樓至平刑關盡境約八百里又轉



南而東爲保定之界歷龍泉倒馬紫荆之吳王口插箭嶺浮圖峪至沿河口約一千七十餘里又東北爲順天之界歷高崖白羊至居庸關約一百八十餘里共二千五十餘里皆峻山層岡險在內者也所謂次邊也外邊之地有夷險迂直總而較之則大同最稱難守次宣府次山西之偏老分而言之則大同最難守者北路宣府最難守者西路山西偏關以西百五十里恃河爲險偏關以東百有四里略與大同西路同內邊可通大舉者紫荆寧鴈次居庸倒馬龍泉平刑諸關隘邇年以來大虜屢寇山西必自大同入寇紫荆必自宣府入固未有不經外邊而能入內邊者遂與巡撫詹榮總兵鳳尚文定計先于五堡外添設諸堡其長邊修築必資內帑少不足用又爲酌處

二十五年二月疏大同東路自陽和口暗門起至宣府李信屯堡紅山臺邊界長一百三十餘里中有鐵裏門鵝鴿峪瓦窰口等處悉通賊要路未有牆塹擬于山南二二三里許添築邊牆一道濬濠建堡增墩立哨使宣大聲勢聯絡且可以南護紫荆屹爲外塹通計經費約用二十九萬餘金期以三月初土脉融動及時興作其督視之任當一付之總兵周尚文俾如中西二路一體悉



心料理乃發兵部馬價銀九萬兩戶部發太倉銀二十萬運赴本鎮周尚文廉勤謀勇守邊有勞修築之役悉以付之三月又疏大同修邊初議起開山口遵山南而東五十里至於水磨口又東八十一里至宣府李信屯之紅土臺總一百三十餘里雖地平工易然紅土臺必由西北築四十餘里始與西陽河合不若自水磨口改從東北踰山崖六十里至於馬頭兒又趨平地渡溝而北一十里又東一十八里至宣府西陽河界之鎮口臺共一百三十八里雖其陡峻中隔西北相懸應援轉運微有不便而西陽得籍一面之防省四十里之力李

信屯以北常戍之兵亦可罷去如此宣大兩鎮均蒙其利兵部以爲大同初不欲修大邊者正慮應援轉運之艱也又鐵裏門鶉鴿峪之間舊有二邊一道可以扼塞諸途若加修治亦足保障何爲舍此大邊十餘里之牆而不爲棄二邊百餘里之險而不守乃復於三邊內重築百三十餘里之垣開山鑿石增墩築堡工力相去豈不百哉上曰築邊之議守臣躬所相視必與适度者殊其如萬達議行宣府興築費計大同當餘四萬兩更發太倉馬價四萬兩助之已萬達復奏頃者臣請城西陽河而本兵以爲疑臣惟修邊爲守邊也不可守則不



必修矣新平堡北故有牆十里今參議蘇志臯所築在山巔不可汲是以臣欲改築於麓徑而省且易守也其鵝鶻峪二邊前歲賊從之入岡崖阻隔聲援不聞卽鐵裹門之軍咫尺千里故臣又以爲不便非聖明獨斷幾搖然更有請者陽和堡雖隸大同東路實近宣府防秋士馬宜令大同列守宣府應援庶爲犄角 上曰大同邊牆總督議甚具兵部從中改請幾壞成事堂上官姑不問奪郎中褚實俸半年兩鎮官兵應援事宜俱如議由是在山西者已極高厚大同本路與宣府之西中二路次第告完連亘千里形勢甚壯又言古稱夷狄之衆

不當中國大縣然所以能爲中國患者彼悍而我怯彼簡而我煩彼專而我渙近虜且併西海吞屬番掠我居民資爲耳目諸酋所市約增數倍每一大舉動稱十餘萬人而我沿邊伍籍縮于舊額尋常師旅莫能邀遮蓋時勢之大略如此夫度形勢之便則詳于外防正以捍內量爲內備所以資外揆時勢之難則今所經略當異于昔而後所經畧當始于今併力以守要益兵以防秋要皆事勢之不得不然者至各兵必帶甲登牆列營待敵者蓋有險而不設與無險同有牆不守與無牆同是故定規畫度工費二者修邊之事也慎防秋併兵力重



責成量徵調實邊堡明出塞計供億節財用八者守邊之事也修邊固垂成之功守邊貴濟時之急國家雖費要非得已其修邊二事一定規畫宣大西鎮與虜爲隣最衝者北路則龍門赤城至獨石雲川接連龍門所百二十里西路則洗馬林至中路羊房常峪葛峪小白羊聯絡龍門城盡界五十餘里亟當繕修其餘稍緩者每歲借用防秋兵糧從宜補築一度工費前工約費糧賞銀十六萬六千一百餘兩今所餘止三千六百有奇乞命戶部再發如前數以便興工其守邊八事除慎防并兵等項外其明出塞者小戰之利大戰之始也兵練而不試一旦遇敵則驕鈍而難用故出塞襲擊乃試兵習攻之術也今後遇虜臨邊駐牧或零虜並塞窺伺及虜大舉入寇其營帳老稚婦女孳畜留塞外者許兵將得擇便出塞掩襲勦殺獲有首功一體陞賞 上是之允行

二十六年兵部請山西內邊寧鴈諸關額有常戍官兵及外邊偏關以西至黃河岸山險水深遇秋但加戒嚴關東及宣大地面亦不必列兵止是預擬信地分布士馬防守先所設兵壯俱革罷遼陝客兵亦免調所省糧犒費且六十餘萬蓋專重大同移山西兵出關從萬達



原議也山西巡撫孫繼魯奏三鎮各有信地自紫荆居庸山海東枕溟渤自鴈門寧武偏頭西據黃河天設重險以衛國家縱使宣大有警諸關據險嚴防則關南可以無恐豈可聚師曠野掣守重關洞開延敵乎夫紫荆拱護京師鴈門等關屏衛全晉一也不掣紫荆以併守宣府反掣鴈門以併守大同非臣所解况自偏頭寧武鴈門東抵平刑關為山西長邊自右衛雙溝墩至東陽河鎮口臺為大同長邊自丫角山起至雙溝止一百四十里為大同緊邊自丫角山起至老牛灣止一百四十二里為山西緊邊論長邊則大同差急山西稍緩論緊邊

山西大同並急此皆密邇河套譬之雙闔門戶山西歲守左闔大同歲守右闔均為緊要山西前日併力守左尚不能支今分力守大同之右豈得無憂近年虜不敢犯者以三關備嚴故也今三關全師在外虜騎在內失事之罪必有所歸萬達復奏繼魯謂丫角以西百餘里之邊為難支然則寧鴈八百里之邊萬一遇虜其易支耶新分一百四十里守以內地之兵為可危然則八百里之邊守以內地之兵不益危耶夫益兵擺邊始于近歲與額設守邊者不同山西舊有協濟大同邊軍實係守要之意今議移寧鴈擺邊之兵量移併守而冗餘之



兵漸減額設官員仍留關隘正不失爲復舊繼魯動以危言相恐始于謝恩疏內已知意見相背近復貽臣書云宣大山西各有巡撫各有總兵各有地面成法具存勅諭見在變亂者固蒙不韙况因而失誤軍機者乎臆臚奏准律有明條敗蹟罔功明主不貸往年建雲中之議宰執幾乎不免近年撤各路之兵部撫業已蒙罪可不寒心又云併守量守省費省兵伐木毀防隱禍深憂難以輕洩夫以臣伐木修營房敵臺等用而執以爲犯禁臣先奉欽依于北樓口採取若緊切路口存以捍虜其與盜伐販賣者何可同也今秋防已逼使撫鎮諸臣

嚴督所屬相與周旋猶恐經營弗逮乃沮撻成議安望有濟兵備劉璽則又雷同附和搖惑人心乞將繼魯別處不然早賜罷臣勿悞邊方大計兵部集議以上奉旨修守事宜令翁萬達嚴督各總鎮協謀整理周尚文亦勿得疑沮繼魯初至輒于謝恩疏內排詆已屬不敬今又騰播私書牽指往事譏測君上敢背明旨挾制總制官沮壞成事錦衣衛逮至京處分劉璽行總督官逮問而修邊之費戶工二部已發三十七萬兩工已報完尚未查覈至是又欲重修請發二十餘萬戶部覆往宣大所修甚多工完已久總兵周尚文請修築餘銀犒



賞軍夫臣以爲事完而後有利功成而後有賞既有剩且  
且有賞是邊牆俱完無可修矣今又奏討前數且其疏  
內稱修過邊牆低薄不堪保障必欲重修果爾彼時朝  
廷發銀時固非欲其低薄以圖節省又非欲有餘剩以  
賞軍夫也而低薄者卒不問則牆何可恃工何可完其  
耗蠹之弊難保必無當加核實報可萬達等言去年修  
築乃大同之東路宣府之西路西陽河等極衝之地今  
所議修則大同西中北宣府中北東各三路蓋量地衝  
緩先後舉行原未重修但臣等心目不逮耗蠹之弊誠  
不能免乞命戶部官二員稽其出納併查往年工費戶

部覆修邊非本部職掌禁革奸弊亦非官司事所請難  
允 上曰兩鎮修築邊牆幾八百里請發僅六十餘萬  
邊臣區畫已詳此與前時無事歲耗帑銀餘百萬者不  
同爾等不看詳章奏率易題覆雖意在節省言非事實  
以致邊臣有此論奏部臣不必遣督撫等官宜盡心共  
事不必瞻顧該司官罰俸一月

二十七年二月萬達奏昔年幾棄大同坐困全晉今量  
掣量留與修邊次第俱頗就緒而臣猶皇皇未能解于  
心者誠見邊臣襲先年守臣之謬嘖有煩言致中外傳  
聞疑信相半夫守大同正以守山西也臣不量力經營



聚守之役而重以邊工其始也衆咸危臣請俟秋防無慮然後定議臣惟天下之事有的然而非者有偶然而成偶然而敗者使其議果未當卽幸而無他猶當改之其議果當卽不幸而有他猶當守之故謀國者不以成敗定是非况任事者敢以異同爲前却耶臣敢繪修完三鎮邊牆圖而以邊關形勢冠于首簡進呈聖覽所有未盡事宜如宣府北路龍門雲川一帶新築牆內多膏腴田宜分撥附近軍民耕種永不起科隨便增築堡塞營房聽其居住獨石馬營赤城各墩共計八十六里并敵臺一百七十三座及滴水崖四海冶永寧

等處宜次第修築工費以修邊餘銀給之三鎮已築之牆隨時繕葺大同大邊二邊遠墩及牆內烟墩非緊要者當革宣府山西牆外墩臺低薄者當修其臨牆舊墩宜悉減撤移墩軍任牆上敵臺哨望仍修甕城房室量給荒田令其携家在種覆上允之大同邊事從此益飭蓋自二十四年萬達初至叅將張鳳報效生員王邦直力戰歿于陣虜死傷塗地我兵大集遁去自是憚不敢入者數年間入周尚文督諸將數出塞破走之大同幾振大酋俺答屢遣使求貢萬達聞于朝請善處時方主收套之議不從萬達亦上書言套虜未可輕逐主議者



亦不聽果受其禍

二十八年有曹家莊之捷虜知不可犯漸引而東奏往  
年修邊之役宣府始西中路者先所急也北東二路限  
于財力間多未舉又以獨石馬營永寧四海冶之間素  
稱險峻朶顏支部巢處其外尚能爲我藩籬或可無慮  
今西中路邊垣足恃虜不易犯其勢必不肯以險遠者  
自阻而朶顏支部復爲所逼徙避他所北東二路之急  
視前數倍試以二路邊計之東路起四海冶鎮南墩而  
西至永寧盡界北路起滴水崖而北而東而南至龍門  
城盡界凡七百里而二路馬步官軍防秋擺邊者僅得

二萬有奇又復摘守南山三百四十里之遙兵分力弱  
守備疎虞若隆慶永寧之間倉皇騷擾南山諸口山梁  
乘虛漫走則畿輔內地不免震驚又安得不爲之寒心  
也事有緩急勢當變更宜之北路谿谷僻仄地產貧瘠  
虜未卽窺者避其險遠無所於利故也近乃入寇至再  
以志在內地又知內無重垣故爾生心若內垣旣固虜  
計斯阻故今左腋龍門衛楊許二衛右腋龍門所滴水  
崖一帶俱當厚爲補葺以絕所必窺設使虜仍貪入則  
須由獨石馬營而南逡巡觀望於谿谷僻仄之間而我  
內垣之守已堅攻不可墮掠無所獲疲其力而衝其歸



路當無不薙之寇矣故外邊以扞北路內險以扞京師尋常竊發外邊自可支持萬一侵軼內險復成犄角天塹人謀相須並用可保無虞茲於東路鎮南墩與薊州所屬火焰墩接界塞其中空築牆僅三十餘里可以省百數十里之戍兵自此而西歷四海冶永寧光頭嶺新寧墩地勢所可守者止循舊邊地勢不可乘者稍有更改俱創築新牆一道北路外邊補修創修務期通完又自永寧墩歷鵬鷄長安嶺龍門衛至六臺子墩而止另爲創修一道據其要害是爲外邊卽與東路新牆連而爲一防秋之時不必退守南山俱須併力外蓋不止

備金湯之設崇虎豹在山之威亦且戍首尾之形收率然相應之利也尚文尋卒萬達召爲兵部尚書憂歸賊犯天城在大同之東兵守不能入賊徻西北去我兵遂怠十八日復由松樹墩掘牆入大同右衛地方又于平虜城係大同之西山西之東我兵相持賊一半留據牆尤恐我邀其歸路也久之始遁去大學士嚴嵩以聞下按臣勘實兵部奏八九月間虜犯宣大潰牆深入大同者抵寧武入宣府者抵鎮城分別罰治

二十九年虜自古北口潰牆入直抵京師教場大略而去伏鸞以入援被寵用事請開馬市虜旋市旋掠市亦



竟罷大同無歲不被兵

見前三卷

三十二年總督蘇祐上言擺邊無益兩鎮之兵計里而分每里不過七八十人既不許移又多避匿虜聚而多我分而寡勢自不支一處潰入千里之守俱爲虛設虜旣入邊我兵反後不若聚而守堡相機出戰足以禦敵部覆邊牆爲已成之業一旦舉而棄之似爲可惜隨宜修補撥軍巡瞭庶可爲耳目之先乃得止山西巡撫趙時春有文武大略請併兵拒戰謂擺邊失策宜止守墩堡仍屯大兵據要害以備應援每營務足五千人一鎮約立三四營選官兼領設法教練輪大營之精騎往來

巡邏以連聲勢隨虜入之多寡走報赴援以遏賊鋒歲功頒賞不吝千金畏怯妄報卽行軍法寧武偏關老營軍士各存本處操備免其更調軍無更戍之勞官省行糧之費其年九月虜犯神池利民等堡時春合兵自出禦之虜方縱掠八角堡忽諜者報虜騎二十餘去此兩舍許疾掩之可盡得時春環甲欲馳總兵李涑等固止曰虜悍狡未可易公第駐此涑當督諸將盡力抗敵必不貽公憂時春大言曰虜知吾來必遯少緩卽不能及矣攘臂而前及虜於大蟲嶺虜伏兵四起鼓譟來感涑太息曰公速去吾死於此矣時春棄衆而奔虜欲取時



春涑等殊死遮鬪逡巡虜騎益衆涑與其子松及大同  
叅將馮恩遊擊李桂神池守備孔賓偏頭守備高遷太  
原指揮陳金中軍尹忠把總俞輝皆戰死涑所將全軍  
皆沒時春倉皇投一墩守哨卒以繩接之而上乃免虜  
尋引去

三十三年總督許論奏前尚書翁萬達議築大牆於大  
同禦虜此今日安邊長策但以兵少不便擺邊於是變  
守牆不若守敵臺之說又變改敵臺爲空輓臺之說一  
彼一此皆非久計臣思之萬達所築邊牆六百餘里沿  
牆有墩臺六百餘座皆在牆內每賊攻牆臺兵旣不得

用力賊已入牆率震駭逃去宜將各墩臺改築牆外每  
三百步一座俾矢石相及其離牆俱不越二三十步之  
間每墩底濶四丈五尺頂三丈二尺高三丈上加女牆  
營房以便棲止下築月城穴門以通出入墩各置壯士  
十人守之遇防秋量增其數約工費可九萬金作治不  
過數月從之發太倉銀三萬兩太僕寺馬價銀六萬兩  
給之

三十六年桃松寨來降

桃松寨者黃台吉之第三妾也私通部目收令哥懼誅乃相率

自大同新平堡求降守者納之宣大總督楊順詡爲奇  
功以來降夷男婦盡送之闕下黃台吉俺答子其士馬  
雄冠諸部且克狡無賴北邊畏之旣失其婦慙恚凡殺  
守舍及其親屬百十人遣騎來索不得乃縱騎掠塞內



大同左右諸城堡爲所攻毀略盡且曰若歸吾婦願以銀馬駱駝相易不則糾衆內訌使爾十年內奔命不休于是大同巡撫朱笈言此酋恥失嬖妾且甘心於我卽今隆冬草枯猶爾咆哮使我餉運阻塞兵不解甲入春何以善後乞亟令該部譯審挑松寨收令哥等情僞從長議處以弭邊患已虜益布滿山谷圍右衛城數重順恐乃言虜願以我叛人趙全丘富等易其逃婦本兵深以爲便亟奏許之于是遣二人還行至白登順令誘收令哥携桃松寨自西陽河夜逸出塞西走乃陰告之黃首選騎追之及于黃河岸執至塞下召其諸婦環視磔裂之刺取心血徧飲諸婦曰異日若輩私奔亦如此矣于是虜狎知順等無能爲散牧威平間攻圍右衛益急

三十七年右衛圍急

上驚趣發兵糧往救時楊博召

爲兵部尚書

上憂邊留暫總宣大事集兵齊進圍乃

得解博請預處兵食以備將來右衛又困城中今僅運米萬石孤危之地非積穀四五萬不堪固守而左衛平

遠天城陽和五處密邇虜巢亦須預處其中東西三路俱當添設墩堡東路尤急請發兵部銀三萬兩修牛心山雲陽鋪各舊堡別築新堡於紅土鋪黃土坡二處仍於各堡空處每四里修墩一座分軍戍之墩堡旣修則當計處軍馬牛心堡設守備一員募軍一千人給馬二百匹紅土黃土雲陽三堡各設操守一員募兵五百人給馬百匹仍計處車營左衛造偏箱車二百輛右衛三百輛候有虜警右衛車營自西而東左衛車營自東而西聲勢聯絡可保無虞至流移之人加意安插漸使復業便宜勞來令其修復私堡再免應徵錢糧三年凡新



# 地

堡車營合用火器宜令工部給發拒門等六堡皆逼鄰  
虜境比之右衛尤爲剝膚請以時修理各建倉積穀千  
石以備緩急尋疏大同各處邊牆傾圮城堡破壞雖有  
士馬不能遏虜之不南請以修復爲要次則塞銀釵驛  
馬等嶺以絕虜窺紫荆倒馬之路備居庸南山一道以  
絕虜窺陵寢畿甸之路修陽方神池諸處牆塹以絕虜  
入山西之路三路旣不能進虜卽馳騁平原而我堅城  
厚堡以待之自不得逞若計萬全非修復邊垣不可而  
事大不可卒議因條十事以上中言修築堡塞請如甘  
肅之法務令堅厚渾源以南如磁窯諸口驛馬銀釵諸  
嶺乃天設險阻爲紫荆倒馬外藩宜經理重其守將仍  
行保定巡撫發銀助工修築再陳修築事宜自右衛至  
左衛每四里加築二墩左衛至高山站每五里加築一  
墩高山站至鎮城每五里創築一墩其左衛高山站之  
間總築一大堡二小堡大堡設操守一人戍卒五百人  
馬百匹小堡把總一人以充守禦高山站至鎮城亦如  
之尋以秋防稍暇請大築邊牆爲經久却敵之計約用  
銀二十九萬半取於本鎮半給於內帑兵部覆大同自  
併墩之說興而三邊之斥埃漸疎乘塞之防廢而右衛  
之藩籬不固遂至胡騎長驅憑陵近郊前事之不遠後



事之鑒也博所請工鉅費少誠救邊遠圖宜發太倉銀  
十萬五千兩太僕銀三萬五千兩聽其隨宜經略工完  
之日具籍以聞俱報可

三十八年博改督薊遼代以張松言守邊要務莫先於  
堡寨宜將堡小人稀虜至不能自保者量地遠近歸併  
大堡各置戎器擇堡衆所信服者一人督率未盡事宜  
聽其酌處仍責鎮巡兵備查理約束又言虜犯蔚州天  
然堡壯夫龐鐸能捐貲率衆力抗一堡幸賴保全且以  
木石擊死數賊收有虜箭賊急攻欲得之鐸令盡取達  
箭約二車許悉脫銃中斷之投堡外虜乃引去其智慮

可嘉乞給與冠帶責令守堡以風示塞下詔可時大同  
諸將數出擣巢有功虜數犯薊遼宣府我亦益習戰不  
復畏虜如往時矣

四十一年總督江東言北虜自二十九年侵入之後謀  
臣經略無慮數家有爲修邊之說者宣府東自開平西  
至洗馬林大同東自新平西至丫角山山西則自偏頭  
以至平刑築垣乘寨延袤三千里而一時中外翕然謂  
可恃以無虞及其虜之潰牆直下曾無結草之固又有  
爲築堡之說者使人自爲戰家自爲守碁布星羅遍滿  
川原然虜一深入望風瓦解村落殲則掠及小堡小堡



# 天

空則禍延中堡中堡盡而大堡存者僅十之一二又有  
謂守無足恃倡爲血戰之說者惟以戰勝爲功不以敗  
亡爲罪而不度彼已易於嘗虜良將勁兵銷滅殆盡凡  
此之計臣已日見其困矣萬不得已惟有保全邊堡一  
策最爲切要而邊堡之所以全者在于積穀增城濬池  
築大墩以便耕牧使商旅通行有警易於收保又造  
輪車以備戰守擇任將帥和睦行陣厚卹間諜嚴禁邊  
軍通虜此確然可行可久而諸邊大弊在於文武不同  
心上下不相信務爲粉飾習于因循亡羊補牢固爲已  
晚方病蓄艾尚猶可及朝議是之然攸邊決戰之說皆  
不可廢兼而用之斯爲完策

四十四年山西巡撫萬恭奏本鎮邊河界起老牛灣西  
及河曲與套虜止隔一水先年拒牆而守至嘉靖壬寅  
總兵王繼祖始倡打冰之說迄今二十餘年因循不改  
朔風嚴烈隨打隨結軍士寒苦多至僵仆其於防禦終  
無足恃計自險崖逮陰灣爲極衝當亟築牆二十里自  
陰灣至石門爲次衝當漸築牆亦二十里築以三千人  
三月可完極衝所費不過五千金然後及於次衝則事  
可漸舉夫守牆則逸而有成打冰則勞而無益守牆則  
我常恃以待虜之來打冰則虜常伺以乘我之敝况



昔之虜患以冬春今在夏秋此時水淺虜褰裳可渡冰何足恃此修復河防之大計也山西內邊自平刑而西至於老營堡五百里外以大同爲障而虜節年屢犯山西率由平虜以西而入蓋平虜之東有威遠大同左右五堡等兵馬氣勢聯絡平虜西至偏老則四顧荒漠墩堡爲墟朔州乃河西之地絕無人煙大同勢孤不能遠顧故近年虜專事西掠而鴈門陽方諸要害之處遂爲虜衝烽火傳報俱不以時至此剝床及膚患也今如臣計自老營東二十里爲賈家屹坨又東二十里爲乃河又東二十里爲顧家店又東二十里爲平虜衛廢堡悉在急宜修築每堡屯軍五百人每五里爲一墩軍勢相連烽火相接遠續大同之手足近復朔州之膏腴東接平虜之血脉南固陽方之門戶北明三關之耳目西通老營之咽喉此修復邊防之大計也以上二計臣任其必可行工費亦不敢取之內帑括諸司贓罰改班軍折銀庶幾一勞永逸禦虜之策無出於此



陝西四鎮

陝西地遠濶重在河套卽榆林城爲鎮搜套者前後二十餘年去而復來余子後削崖設牆爲固于是延綏獨重與寧夏相首尾又西北千餘里爲甘肅通哈密要道孤懸河外合曰三鎮始命王越爲總督有戰功封威寧伯越去虜數入寇以上見虜紀中弘治中秦紘總督改開城縣爲固原州建府其中以固靖甘蘭四衛隸之築豫望石峽口雙峰臺三城金佛峽海子口等處七堡甃石爲垣裹鐵爲門邊牆延袤千餘里自後始稱四鎮以歷年所造兵車西邊諸鎮尚有存者但皆雙輪大車車用二十



人推輓其行甚遲少遇溝渠險阻卽不能越以是不適於用紘改造隻輪小車奏呈 孝廟賜名全勝車且戰且守虜始稍戢正德中楊一清築白馬城堡以絕東路之寇嘉靖初王瓊築下馬房關中路之患得免十五年唐龍言花馬池定邊營之境乃虜騎入犯要衝請自乾溝定南八墩至石澇池堡寧朔墩一十七里之間創築新牆自寧朔至永濟堡昌平墩九十餘里之間增築舊牆以固疆圉十六年劉天和奏平慶臨鞏之間乃虜出入要道其中故有堡寨率多頽廢請一切增築倍使高厚歸并小堡編立保甲堡擇有力者一人爲之長多備矢石遠設斥埃烽火及時收斂人畜各自爲守大虜入境有能控險劫營斬獲首虜者與軍士同賞所獲牛馬因以與之地方在軍衛牧所者責成將領兵備苑馬及衛所監苑之長在有司者責成守巡各道及郡縣之長巡撫都御史每一年閱視如堡寨堅完虜無所掠諸臣皆以輕重受賞不則有罰由是邊防漸飭因秦紘車制稍爲增益其上置銃炮鎗斧大小兵器以百五十斤爲率箱前樹獸面牌繪以獅貌之像兩傍各施虎皮以蔽矢二車相連可蔽三四十人車用二人更推一人挽之又二人翼之虜衆卽入倚牆布車一里之中用車十輛



戰則各隨地形連環布陳騎士居中敵遠施火器稍近  
弓弩又近短兵接敵走散騎士出追夜用火箭虜騎合  
圍則火器弓弩四面齊發制隨車小帳令士不露宿旣  
可擺列以遏虜之入又可控險以扼其歸諸邊佛郎機  
流星砲一窩蜂砲品字銃銅鐵神鎗見貯甚少不足用  
省城貯有神臂弩相傳已百餘年其矢不存自以意創  
爲弩矢射可及三百步復準漢耿恭之法矢鏃開四尖  
又傳以射虎箭藥人馬中之無不立斃入斡處用膠如  
筆毋論中不中一著人卽落虜不得反射蓋虜之射藝  
極精矢無虛發惟此足以制之寧夏邊牆三百里前尚

書楊一清王瓊唐龍已相繼修築其中興武營一帶七  
十餘里不堅卽爲改築自寧朔墩至昌平墩九十里增  
修舊牆以衛舊安邊孤懸之勢總兵梁震復於李乾溝  
要路大加剗削乾澗之中挑挖墩塹以制虜入在延綏  
則乾澗之工以二萬六千定南定朔十七里之工以一  
萬六千在寧夏則興武營邊牆七十里之工以三萬六  
千共七萬餘金興武營之南有鐵柱泉方可百步虜每  
來必至此飲馬居數日而後入及其驅掠而歸亦至此  
飲牧數日而後出泉上有小堡增築高大包其泉于堡  
中兵百人一千戶將之據守其地堡外空地甚多令堡



軍儘力開墾三年之後從輕起科又其傍石溝有鹽池  
 卽令堡軍采食虜數百里無飲馬之地遂不能深入惟  
 西路自徐斌水至黃河岸六百餘里地勢曠遠終難保  
 障今江寺堡東南起至徐斌水鳴沙洲河岸可百二十  
 里總兵任傑議於此地修築新邊一道遷紅寺堡於邊  
 內撤舊墩軍士使守新邊舍六百里平漫之地守二十  
 里易據之險又占水泉數十處斷胡馬飲牧之區召軍  
 佃種可省餽餉爲給事中朱隆禧等所駁詆以棄地甚  
 至謂余子俊修邊不以黃河爲界而河套爲虜所據初

長撫陝西建議安邊營平曠難守宜退守中山披其後  
 按李敏亦言開疆展

土乃壯國之圖退地棄城豈守邊之策且封疆百里城  
 池三座豈可輕棄若曰空曠難守則定邊花馬池何以  
 防守若曰糧運艱阻則寧夏高橋兒何以運餉議與川  
 合後子俊爲兵部尚書固守前議言臣嘗訪求古今守  
 邊事宜安邊及新興永濟等處水少昔范仲淹守鄜延  
 必據水與險永樂間棄東勝不守亦其明驗况今實未  
 嘗棄平

詔可 寧夏與山後諸夷爲隣賀蘭山其界也自王瓊

棄鎮遠關創爲新邊而賀蘭山爲虜所據遂使延寧二  
 鎮受患至今其誕妄如此部不敢主議格禮部主事許  
 論謂固原爲堂奧響水溝至花爾全爲二門花馬池爲  
 三門不守門戶守堂奧非計請移總督于花馬池大建  
 城堡添設叅遊分屯重兵于清水營令三百里間聲勢  
 連絡此亦居中乘便之法天和謂河凍後虜隨處可入



不止花馬池套無大虜仍居固原若群聚套中勢將入  
犯則總督于五六月赴花馬池統調諸軍禦之延寧二  
鎮延袤廣濶其間城堡如延綏定邊營一帶有相去九  
十里許者宜于適中之地再爲添築使聲援相接可資  
保障又言堡之工大難辦墩之費省易爲且有三利民  
便于趨避烽火相接足懾虜心盡據水草善地虜馬不  
能入夜即宣大三關亦宜舉行從之楊守禮勘報延綏  
東西三十四城堡獨當黃河一面之險宜增修仍統以  
都指揮其定南定北乾溝乾澗併兵番守張珩言花馬  
池至安定諸堡長亘二百餘里當虜之衝乃全陝要地

宜于舊墩舖空處添築敵臺二百六十三座幫築四百  
一十七座鎮遠關黑山營乃寧夏門戶近爲犬羊牧地  
當議復各沿邊諸堡多無室家視如傳舍改爲千戶所  
令有定居聽開墾近邊地土爲屯種計綏德爲石隰襟  
喉延鄯門戶崇山巨障號稱險阨自築牆後直控河陰  
綏德撤備近年虜乘虛入犯仍設屯堡增守備把總各  
一員二十六年曾銑疏延綏與河套爲隣前都御史余  
子俊修築邊牆一道東自黃甫川起西至定邊營止約  
千五百餘里歲久傾頽嘉靖九年總督尚書王瓊以虜  
數自本鎮西境入犯乃修花馬池邊牆一道復自寧夏



橫城接築至定邊營約三百餘里爲障而自定邊營至黃南川一帶無牆連年虜入率由是道所當亟爲修繕顧地廣工大難責効期月宜分地次第修舉西起定邊營東至龍州堡長四百四十餘里爲西段廼環慶保安要塞所當先築自龍州堡東至雙山堡長四百九十餘里爲中段自雙山堡東至黃南川長五百九十餘里爲東段歲修一段期以三年竣事庶幾保障功完全陝攸賴乞發帑銀如宣大山西故事衛發二十萬兩給之然銑志在復套其銀皆爲車馬器械之備尚猶未足歲用百四十萬金無暇興工得罪死王以旂言延綏一鎮邊

牆計用銀二十萬三千六百餘兩三年次第築成先發十六萬餘兩明年再發先是西虜惟吉囊最強合俺答屠戮秦晉吉囊旣死子吉能等聽命俺答大入薊鎮宣大山西無寧歲間犯延綏寧夏陝西殺一總兵餘皆敗去西埤虜寇始稀甘肅一鎮自陳九疇破賊後楊博通水利屯田墾荒永不起科嘉峪關外諸夷時時竊發道里寥曠斥埃疎隔增築榆林泉諸處聲勢聯絡易于哨守莊浪當海套二虜交馳之所邊鄙荒殘行旅震懼舊有遊兵一枝移於安遠堡適中駐劄東制鎮羌岔口以達莊浪西制黑松古浪以達涼州永寧有尚家等堡可



以互相防守又迤北平泉等處添築一墩以便傳警蓋本鎮所苦在土魯番自馬黑麻納款使者八伯人入居甘州其患始息稱樂土焉

朱史氏曰暴秦長城千古口實然先趙靈王業爲之蓋皆以人工當天塹此夏受厲民作備之續也而蒙恬之死乃歸罪于絕地脉恬之當死恐不在此要之禦胡中策舍是無可仗者漢主于戰二萬人可成緣邊九郡唐務廣地一蹶而縮都鄙數驚宋失幽燕無險可據專恃講和其初使命往來等于兄弟旣乃支吾狼狽稱臣降爲叔侄辱爲俘囚我朝斥地萬里初自大寧由開平

直接宣大繞河據東勝帶寧夏出甘肅包絡洮岷并收青海域外之域盡經搜捕險外之險皆作藩籬威以畏之惠以招之控關修隘以防之織悉具備無以加已一再傳後餘威震于喜峰陷駕猶然迎復規模尚在虬虺無虞亡羊補牢未足爲喻失馬操轡其出不窮自余青神而後大約以修築邊牆爲主虜之所短在攻我之所長在守因山起伏隨地回旋推之各邊寸寸壘之人人力之歲歲增之東西何啻萬里秦感之一旦而有餘我需之百年而未足此仁暴之分一以亡一以長世判然華夷之大界也往事班班皆有可述中間用兵調度



分合以至偵探點聞雖不專恃一牆顧趾定而後心不  
搖身依而後群不渙藏無形之險于有形寓不測之威  
于可測未及乎上且得其中謹守其中亦不落下此勞

臣之極思亦 聖祖之遺意也廣寧而西本有邊牆遼東

三面受敵故兵分三路廣寧為中路開原遼陽為東路  
前屯寧遠錦義為西路遇警彼此應援遼陽西一百六  
十里廣寧東二百里有遼河分界冰結則人馬可行一  
開賊或先據我兵雖有渡船不能猝濟彼此勢孤關係  
非小正統十四年虜犯廣寧遣兵據此已有明驗成化  
十三年馬文升造大船十數橫列河中下聯鐵索上加  
木為浮橋兩岸豎大木為柱總繫其纜遣兵護守設或  
有警則東西聲勢相連不致誤事其後錦義一帶城堡  
時時修葺添補寧遠前屯尤為要害嘉靖中朶顏部落  
那麻真等盤據虹螺山窺伺剽掠我牆垣摧圯茫無界  
限巡撫於敖南起鐵場堡北抵小虹螺山臺止修濬牆  
濠凡四萬五千餘丈墩臺凡一百五十餘座其永安堡

三山營之中與開原之遼海莊科李千戶屯  
各增建城堡計經費用銀三萬六千兩有奇 三岔河以

北自大寧既失與虜共之奴伏于東初為嬰豎後乃虎

狼方危急時速修廣寧之險多築臺堡招募兵十一之

費三月可成半年可遍旌旗相望刀斗時鳴奴決不敢

輕入即入堅壁相持三日而餒七日遁矣乃言戰者輕

于一擲固為失筭言守者三方布置用兵十八萬添餉

五百萬何處着力茫然望洋昔耿恭在西域數十人可

支半年臧質在鍾離五百人可抗百萬守者自逸多多

何為即以其人之言反詰之將何以對憤盈已極粗復

難醫全哆筆陣之鋒大笑同舟之敗封疆棄矣山海奔



矣舉朝皇皇嗤且罵矣此時七尺之軀甚輕不死敵尚存面目入國門蓋猶欲卸罪于戰也賜劍蟒玉委草土以無慚破帽囹圄尚咆哮而求脫斯之豪傑千古未有真國運之一阨也

邊儲

國朝邊費自屯田子粒外商人納米中鹽米無甚貴之時軍民皆濟成化八年開設榆林衛余子俊巡撫增置城砦陝西民供不繼奏送江南折糧銀以補不足用南京折銀例每一石二錢五分放支軍士其後大同等邊缺乏亦暫送銀補足數皆不多未有以萬計者弘治初戶部尚書葉淇變鹽法輸銀運司邊方米價騰湧正德五年侍郎叢蘭整理陝西邊儲令百姓每石徵銀二兩五錢正德初戶部奏送各邊年例銀瑾以爲祖宗朝無此例命尚書王佐查天順年以前年例銀數佐對以



無初未及引榆林銀米本末也瑾怒遂罷年例之送瑾  
誅復舊嘉靖三十一年虜勢日張仇鸞誕上選各邊兵  
入衛卽募補大同二萬宣府一萬逾年不增一卒堪任  
戰守者總計不過二三千人蓋養兵之費戶部以爲非  
年例不肯發鎮臣亦以非年例不敢請又自馬市興邊  
牆爲虜所壞者十五蕩無隄防屢奉詔尚未興築兵部  
以爲言下令着實修舉仍留二鎮選兵待戰大發餉銀  
濟之三十二年總兵岳懋戰死虜屯聚大同左右等衛  
我軍饑乏士馬物故者枕藉于道 上聞怒逮前總督  
蘇祐發銀十萬以賑仍區畫召買以濟戶部總計歲入

糧稅馬草絲絹布疋戶口食鹽關稅鹽課等項除存留  
及起運邊腹外額該漕運京通倉米四伯萬石解京庫  
銀二百萬兩有奇京邊用度胥此仰給其銀舊以七分  
經費存積三分備兵荒爲常嘉靖己酉以前歲支最多  
不過二百萬少者七八十萬庚戌之警有時增設遂沿  
爲常例者如各修邊銀自庚子歲節發且八十餘萬客  
兵銀自庚戌後每歲增二百餘萬之類是也有逐年加  
派遂倍於常額者如京營馬匹草料歲支草本折各二  
十餘萬募軍調發等銀歲加共一百餘萬之類是也有  
因循日久糜費而不可省者錦衣衛官軍月支米至四



萬石光祿太常厨役月支米六千石神樂觀樂舞生各  
監局匠役月支米七伯餘石各衛官軍歲支米至三百  
一十二萬餘石其間冗員未併冗食未汰之類是也有  
侵冒日甚牽制不可禁者光祿歲派供用外每歲用銀  
數十萬各邊修守每年據前用數外無慮數百萬其間  
統領收支之人不無陽出暗藏移寡入多與夫一切調  
掣分付無法冒濫不實之類是也嘉靖三十年辛亥所  
發京邊歲用之數至五百九十五萬壬子五百三十一  
萬癸丑四百七十三萬甲寅四百五十五萬乙卯四百  
二十九萬丙辰三百八十六萬丁巳三百三萬計太倉

歲入銀數不能充歲出之半由是爲一切之法箕歛題  
增派括贖贖筭稅契折民壯提編均徭推廣事例興焉  
其初亦賴以濟久之諸所灌輸益少值四方多事有司  
徃徃奏畱請免如浙直以被倭川貴以採木山陝宣大  
以兵荒不惟諸軍興徵發停格卽歲入二百萬之額且  
虧其三之一而內庭之賞給齋殿之經營上時以夜  
半出片紙有所徵取吏雖急無敢延頃刻者三十七年  
大同右衛告警今歲自入春來發宣大銀二十六萬有  
奇而天下民運至太倉者銀僅七萬帑儲大較不及十  
萬兩邊臣奏討日棘尚書方鈍等憂懼不知所出乃乘



間陳帑藏空虛狀因條七事大約不過增鹽引徵拖欠處賦罰等其一借南糧

南振武營之變因此

議上切責鈍謀國不

忠令再議皇恐謝罪請先發太倉續收銀五萬及近地米豆三萬石并聽選監生願輸本色者悉赴大同乃得解 上復問大學士嚴嵩對帑藏雖匱然天下之財大有可通變足國者若革裁冗費追逋折解咄啐間即可得數百萬顧司計之臣束手不能措畫當下廷臣會議于是改鈍南京代以賈應春諸大臣條陳理財二十九事亦不過加納徵折增課下及廢寺庵觀水櫃餘田與減車船夫役驛遞舖陳而已得 旨允行惟充軍先

後議贖皆不許言者一以選兵汰冗爲主四十年戶部會計各邊應發年例餉銀大同四十四萬七千兩宣府二十四萬兩山西十四萬兩延綏二十七萬五千兩易州五萬三千兩薊州三十七萬四千兩密雲十四萬五千兩昌平六萬五千兩并究運京倉米四萬石赴密雲昌平通倉米四萬二千石赴薊州抵年例之數蓋浩繁極矣而密雲昌平二鎮年例餉銀連歲俱防春用盡防秋仍用三十二萬有奇攷三十六年邊餉密雲只八九萬昌平只三五萬前後懸絕若是各邊皆有侵冒尤莫甚于薊鎮前總督許論坐斥戶部侍郎霍冀往覈冀與



總督楊選會議上言薊鎮主客錢糧自庚戌年京運始發至庚子年額數愈增如薊州主兵舊只六七萬今則十四五萬矣客兵不過八九萬今則二十三萬矣往時薊鎮主客兵止四五路今則增為十區副叅遊守添設至數倍矣往時未有客兵俱主兵調度今則不遠千里而山陝遼保分番征調已十餘年矣此年例之所以愈增而愈不足也顧民運逋欠動逾萬數乞命該部申飭責成以釐宿弊 詔可四十三年發邊主客軍餉及在內供億之費共三百六十三萬各項正賦及節年欠所入顧止二百四十七萬兩

此後籍沒嚴世蕃羅龍文分半濟邊當一百一十萬出

浮於入凡一百一十六萬兩賴會議各項銀六十五萬事例銀五十一萬僅能支給今各省會議各項銀解納不前事例之開三年限滿前項歲例不足銀數無從處給其寧夏年例主兵銀二萬五千兩客兵銀二萬兩延綏主兵銀十九萬兩新增募軍料銀三萬兩客兵銀八萬兩甘肅主兵銀二萬兩固原主兵銀七萬兩歲以為常無所加減宣大山西三鎮四十二年共發過客兵銀三十三萬兩明年增至三十九萬兩又明年增為四十五萬兩至薊密諸處視昔更為倍增其時各邊例銀惟宣府最少尚可考自十八年前歲用年例京運淮蘆鹽



引河東鹽價各省民運及本鎮歲徵屯田地畝圍種之數共本色米豆二十八萬八千八百七十石有奇草二十萬七千七百七十束有奇折色銀十二萬六千五百七十九兩有奇自是而後雖有  
三十年以來以新募軍馬而增發帑銀或以內帑不敷而添補鹽引或以增給芻糧而加徵民運腳價遂多至銀三十二萬三千二百餘兩詳推弊源蓋由十九年前軍馬未必盈於八萬之額時且歲豐田登民運交至鹽引復皆報中故雖有虜患猶足濟用三十年後邊地之豐瘠靡常民屯之逋欠日甚鹽引之報中漸少而軍數

且日加於往年將新增銀糧裒益其間庶足以給于是邊臣將新增三十萬之數留本鎮另貯名曰歲餘毋得輕動俟年例民屯等項月給糧餉不足之時始呈部借支後仍以正項之數補之其客兵守牆煩費不貲出塞爲尤甚故一歲之支至有四五十萬以上者自十九年至四十年總用經運銀引及鹽引銀五百九十五萬六百兩此皆年例之所未有歲入不會者也虛耗財用孰大乎此自三十七年以來豫發召買曲計出納以地量兵因兵度餉仍較論路分衝緩以爲蓄積更量移諸鎮陳粟汜爛者隨宜處置由是軍餉漸充數亦漸減此四



十三年總督江東巡撫楊巍籌畫以後各鎮皆行此法  
邊計稍紓總論各邊增費在薊鎮十七在宣大山西十  
二陝西四鎮獨延綏因選兵入衛稍增十一其甘寧固  
歲額京運視嘉靖初非惟未增抑尚多減在甘肅五萬  
一千有奇通計四鎮歲額止當薊鎮之半陝西三邊東  
至延綏黃甫川西抵甘肅嘉峪關西南抵洮岷遠接四  
川松茂延長數千里各鎮兵馬總計兵三十餘萬以分  
守迂遠之邊無所不寡南番北虜四時戒備一歲芻糧  
數百萬計除京運外皆取足民屯鹽糧視他鎮半請帑  
銀者不同三十四年會計延綏舊設軍兵六萬六千餘

名今止五萬餘名馬二萬九千餘匹今止一萬三千餘  
匹歲用五十六萬浮費不下一十四萬寧夏舊設軍四  
萬四千餘名今止二萬八千餘名馬二萬四千餘匹今  
止一萬二千餘匹歲用四十一萬有奇浮費不下一十萬  
甘肅舊設軍四萬五千餘名今止三萬五千餘名馬二  
萬七千餘匹今止一萬八千餘匹歲用四十一萬有奇  
固原舊設軍七萬九千餘名今止一萬一千餘名馬三  
萬五千餘匹今止八千餘匹歲用三十四萬有奇浮費  
各不下一十六萬求其增費之源與耗財之弊約有五  
端藩祿歲增借移軍餉一也兵荒多故常稅屢蠲二也



舊米賤折輕今米貴折重三也舊邊兵畫地而守相機而戰今按伏調遣行糧加增四也召募無定數陞賞多冗員五也至於逃亡倒失朦朧濫支此詐冒積習之弊通負侵沒因緣爲奸此徵解積習之弊報警則以小爲大出兵則以少爲多地里遠近日期後先或可緩先發或應掣故畱此征調積習之弊使車賓旅實繁有徒供給饋遺冒支儲糈此支放積習之弊令會議酌費求經久可行之策以聞

皇明大事記卷之三十五終



此水新新今本頁折重二也其邊在書地而守和  
田戰今按伏湖邊行糧加增四也召募無定數擇實  
元員五也至於逃亡倒失疎懈廢文此計目前情習之  
連資侵沒因緣等并此微解情習之弊報官則以小爲  
大出兵則以少爲多是里遠近日期後先或可幾先  
或應擊後顧憂之兩稍習之弊使車資旅官繁有徒供  
給簡遺日支儲備此文及精習之弊今會議酌費求  
又可行之策以歸

上明大書記卷之二十五終



